

三萬兩作為開辦之費常款則擬將銅元餘利除部提四成其餘六成除機器局學堂開支並年底紅獎外餘銀若干全數提為礮彈兩廠經費如有不敷隨時籌補又查滬鄂礮廠工料表每礮一尊約銀千兩以上若購自東洋則購價運費每尊約銀二千餘兩今開辦一廠合計年出礮彈兩項省費甚鉅開辦之後若能多購各國新式戰守等礮作為標本遴選具有學識工匠密考精研力求進步必能自出新式而所出之數亦將日多一日後此若再能擴張廠地規制愈宏與滬鄂兩廠分應所求於大局裨益非淺據司局等擬定章程詳請具奏前來奴才覆核無異除將章程分咨陸軍部度支部農工商部查照立案外理合附片具陳伏乞 聖鑒訓示謹 奏光緒三十四年三月十四日奉 硃批該部知道欽此

署山東巡撫吳廷斌衍聖公孔令貽會奏稽查濟南等屬學務摺

奏為稽查山東濟南泰安兗州濟甯州四屬學務事訖先行恭摺會陳仰祈 聖鑒事竊臣

令貽奉 命會同山東巡撫稽查本省學務於上年五月間請 訓出京六月初二日馳

抵山東省城業將到差日期 奏報在案是時正值各學堂暑假休課無從參觀遂與正任撫

臣楊士驤研究學務辦法並調查本省辦學各項案卷竊維育材之道以培植根本為先辦學之方以考覈實際為主東西各國於學術進步之事彼此擇善而師然於本國獨擅優勝之學賴以團結國家人民者學校中必注意教授弗使失傳故新學新理互相發明而其國民性質雖經各種陶染宗旨屹不少變中國數千年來以文學經術立國垂教久遠現雖設立學堂於

圖算理化各科史迹時務等事分門講肄期於一變從前固陋養成通達之材使非文學經術確有造詣雖科學得有門徑亦惟習其藝而昧其理知其細而忘其大則改良學校之謂何哉至辦學經費皆由公私籌集必須會計精詳勿使浮濫庶足以推廣教育收隨地興學之效臣令貽抱此意見於八月間會同臣廷斌分期周歷省城所設各項學堂於功課則注重經史國文於規制則兼核度支各事前署提學使試用道方燕年曾兩次出洋考查學務洞悉教理現署提學使羅正鈞亦曾出洋才學精實到任以來循舊接辦故各校監督堂長等於教授管理均能盡心任事雖規模形式較外國或有繁簡之分而教育精神斐然可觀者已占多數臣令貽稽查省城各學堂事竣卽出省由泰安府而濟甯州而兗州府一路參觀調查每到一處學堂必照所持宗旨悉心考核並取生徒所習講義及所課文字細加觀覽其有授受不合者隨示以改良之方而經費出入亦必核其簿記逐款諮詢至所屬各州縣學堂由臣等會同遴委諳習學務人員分往稽查使於各處之學堂名稱校員之出身名籍及所任之課目時間學生人數班數校中有無產業及出入分銷之各項詳數逐一填註統計表並使加以議論彙核報告臣令貽於十一月十五日將三府一直隸州學堂查訖其分查四屬州縣委員則因途間風雪時作馳驅往返不無稽遲至封印前始據先後稟覆前來臣等綜核四屬所設學堂辦理悉遵定章學生亦無浮囂習氣以濟南泰安兩屬爲較優餘皆逐漸擴充力求進步現值各校均已開學臣令貽抵省與臣廷斌會商一切擬卽續行按府稽查隨時相度情形籌畫改良總期

實事求是俾學務日有起色以仰副 朝廷作育人材之至意所有 臣等年前稽查濟南泰安
兗州濟州四屬學務緣由謹合詞恭摺具陳伏乞 皇太后 皇上聖鑒訓示再此摺
係 臣令貽主稿合併陳明謹 奏光緒三十四年三月十四日奉 硃批學部知道欽此

廣西巡撫張鳴岐奏調修撰駱成驤等辦法政學堂片

再廣西地居邊徼吏材素乏近值釐定官制舉凡司法行政需材尤殷前撫 臣林紹年於上年
冬間奏明將法政講習所展拓校地改辦法政學堂並請由部揀發人員來桂入堂肄業期成
治才以備時用現該員等已經陸續抵省學堂亦將竣工亟應定期啓學惟法政科學廣奧以
及管理規則靡不繁難非通曉有素之員不足以肩此責務茲查有學部奏派游學日本翰林
院修撰駱成驤留學日本法政大學舉人揀選知縣蕭仲祁彭兆璜候選直隸州州判黃德章
貢生成應瓊京師法政學堂學生附貢生陳嘉會均屬品端學粹淹貫中西不悛己長熱心教
育合無仰懇 天恩俯准將駱成驤蕭仲祁彭兆璜黃德章成應瓊陳嘉會六員調桂分充
法政學堂監督教習管理各差並照定章調辦學務之職官免扣資俸不停升轉銓選俾得專
心任事造成法政人才於吏治可期收效除分咨查照外理合附片陳請伏乞 聖鑒訓示
謹 奏光緒三十四年三月十四日奉 硃批著照所請該衙門知道欽此

摺奏類二

吏部等奏核議浙江省叅劾六法人員摺併單